



Fasnacht 2026

Sujet: **Au mir säge Merci...**

100 Joor Migros es tuet uns gfalle
aber das **Merci** tuet in unsere Ohre halle
mir sind au es bitz verstört
hesch s'ganze Joor numme das **Merci** gläse oder ghört
doch mir wänd dr orangeschi Ries nit kritisiere
im Gegeteil mir löhnd uns vo dem **Merci** lo inspiriere

Unseri Winzer sind bi dä Beschte drby
ob Rosé, Wyssse oder Rotwyy
drum **Merci** für das Prattler Wunder
10 Joor Gmeinipräsi Stephan Burgunder

Öper anders darf au jubiliere
und cha sit 60 Joor brilliere
s'Komitee tuet dr Umzug organisiere
drum möchte mir do unser **Merci** deponiere

Apropos Komitee do gits Eine
sehr e grosse gar kei chleine
isch sit 13 Joor im Komitee
chasch ihn vorem Schloss nit überseh
11 Joor drvo tuet er dä Hufe leite
Merci Peter händ mir dich dörfe begleite
jetzt isch aber fertig, das isch kei Zytigs-Änte
und du darfsch ändlich in d'Komitee-Ränte

So z'säge au in d'Ränte gange
isch wegem abnehmende Verlange
das wo's gratis geh het vo Mentig bis Fritig
jo genau, d'20-Minute-Zytig
me gseht sie no zum Teil, die blaue Chäschte
längsch ine tuesch aber ins Leere taschte
denn die Zytig hebsch nüm vor s'Gsicht
Merci jetzt isch online läse Pflicht

Online und Digital isch sowieso IN
mir fröge uns scho, macht das Sinn
Fahrzügenwis, ID, Pass alles gits digital
Online bstelle chasch alles, es isch katastrophal
e Usnahm isch dr QR-Code vo uns Dorfplatzrueche
dä gsehsch am Wage und muesch nit online go sueche
drum säge mir scho emol **Merci** und Danke
für jede überwieseni Franke

Apropos zahle do fällt uns i
do sind mir das Joor voll drby
möchte in Birsfælde dr Stau umfahre
drum ab, durch s'Quartier mitem Charre
bruche knapp 10 Minute mir tüent danke
koschtet uns aber 150 Franke
drumm es **Merci** mir werde ganz bleich
wege dem 15-Minute-Durefahr-Saich

Gar kei Saich sondern dr Hit
isch das wo's im Januar git
während anderi an dr Plakettevernissage fiire
tuet Prattler Fүүhrwehr brilliere
sprütze die ganz Nacht dr Grossmatt-Schulhuusplatz voll
das wird super und ganz toll
drum es **Merci** dr Gmeind und dr Fүүhrwehr s'isch dr Wahn
dank Ihne gits wieder emol e Kunschtisbahn

Nit so Freud macht uns d'BVB
wieso das hesch an dä fahrende Būs chönne gseh
will jede Summer mir sage **Merci** nämli
flicke sie d'Gleis und es fahre keini 14er Trämli

Au immer s'Gliche isch am 1. Auguscht und Silveschter
mir rede vo dene Lüt wo es bitz sind vo geschter
tagelang vorher scho Rakete abloh und lo knalle
die wärdes in 100 Joor nonig schnalle
drum säge mir scho emol **Merci** jedem Idiot
und hoffe es chunnt gli das Fүүrwerks- und Böller-Verbot

Was bereits cho isch, das neue Gsetz
die Eint oder Ander Clique het es Ghetz
will jetzt muessme dr Wage prüefe lo
dr Kanton sait: «Das mache mir so!»
Isch denn alles in Ornig und OK
bechunnsch das sogenannte BESIBE
drum möchte mir au **Merci** säge
und wüsse er isch top zwäg, unsere Wage

Mir Dorfplatzrueche tüent gärn feschte
dört ghöre mir zu dä Beschte
stosse mit es paar Bierli a
es darf au öpis anders ha
drum es **Merci** für wunderbari 150 Joor Braukunscht
vom Feldschlössli dänk, was denn sunscht

D'Fasnacht 2026 wird famos
aber ohni euch wär nüt los
d'Komitees und d'Hälfer wo organisiere
alli Fasnächlter wo musiziere oder intrigiere
au d'Bsuecher am Stroosserand
für euch mache mir dä grossi Ufwand
drum möchte mir euch allne **Merci** säge
ihr müend Dorfplatzrueche au das Joor ertrage